



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁ**

ք. Երևան

17.12.2018թ.

Ո Ր Ո Շ ՈՒ Մ

ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ

ՔՆՆՈՂ ԱՆՁԻ

թիվ ԱՅ-ԷՍ-2018/182

ՀՀ գնումների հետ կապված բողոքներ քննող անձը (այսուհետ՝ նաև Բողոքներ քննող անձ)՝ ուսումնասիրելով Հայաստանի Հանրապետության ֆինանսների նախարարության կողմից 29.11.2018թ. թիվ 27/26-3/21864-18 գրությամբ «ԲԻՋՆԵՍ ԹՐԵՆԴ» ՍՊԸ-ին (ՀՎՀՀ 01263483) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեց հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, ՀՀ պաշտպանության նախարարության (այսուհետ՝ նաև Պատվիրատու) 22.11.2018թ. թիվ ԴՎԱ/4612 գրության հիման վրա, 29.11.2018թ. նախաձեռնել է «ԲԻՋՆԵՍ ԹՐԵՆԴ» ՍՊԸ-ին (այսուհետ՝ նաև Ընկերություն) գնումների գործընթացին մասնակցելու իրավունք չունեցող մասնակիցների ցուցակում (այսուհետ՝ նաև Ցուցակ) ներառելու ընթացակարգ՝ ՀՀ գնումների հետ կապված բողոքներ քննող անձին ներկայացնելով համապատասխան հիմքեր:

2. ՀՀ պաշտպանության նախարարության ներկայացրած փաստարկները և դիրքորոշումը.

ՀՀ պաշտպանության նախարարությունը 22.11.2018թ. թիվ ԴՎԱ/4612 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«Հիմք ընդունելով ՀՀ պաշտպանության նախարարության և «ԲԻՋՆԵՍ ԹՐԵՆԴ» ՍՊԸ-ի միջև 20.09.2018թ. կնքված NՀԲՄԱՊՁԲ-7/9-1 գնման պայմանագրի 2.1.7.1 կետի «բ» ենթակետի պահանջները՝ ՀՀ պաշտպանության նախարարությունը 2018թ. նոյեմբերի 19-ին միակողմանի մասնակի լուծել է վերոնշյալ պայմանագիրը:

Վերոնշյալ պայմանագրի լուծման վերաբերյալ գրությունները 19.11.2018թ. հրապարակվել են www.gnumner.am հասցեով ինտերնետային կայքում:

Բողոքներ քննող անձի կողմից հրավիրված նիստերին մասնակցում էր Պատվիրատուի լիազորված ներկայացուցիչ Սարգիս Պետրոսյանը:

3. «ԲԻՋՆԵՍ ԹՐԵՆԴ» ՍՊԸ-ի ներկայացրած փաստարկները և դիրքորոշումը.

Բողոքներ քննող անձը դիմել է «ԲԻՋՆԵՍ ԹՐԵՆԴ» ՍՊԸ-ին՝ հնարավորություն տալով ՀՀ ֆինանսների նախարարության կողմից 29.11.2018թ. թիվ 27/26-3/21864-18 գրությամբ Բողոքներ քննող անձի մոտ նախաձեռնված ընթացակարգի վերաբերյալ ներկայացնել Ընկերության գրավոր կարծիքը, սակայն վերջինիս կողմից որևէ գրավոր կարծիք չի ներկայացվել:

Ընկերությունը պատշաճ կերպով ծանուցվել է Բողոքներ քննող անձի կողմից հրավիրված նիստերի ժամանակացույցի վերաբերյալ, սակայն չի ապահովել իր ներկայացուցչի մասնակցությունը նիստերին:

4. ՍՑ-ԷՍ-2018/182 ընթացակարգի քննության համար էական նշանակություն ունեցող փաստերը, Բողոքներ քննող անձի հիմնավորումները և եզրահանգումը.

Բողոքներ քննող անձն ուսումնասիրել է ՀՀ ֆինանսների նախարարության 29.11.2018թ. թիվ 27/26-3/21864-18 գրությունը և կից փաստաթղթերը, ՀՀ պաշտպանության նախարարությանը 22.11.2018թ. թիվ ԴՎԱ/4612 գրությունը, ՀՀ

պաշտպանության նախարարության և «ԲԻԶՆԵՍ ԹՐԵՆԴ» ՍՊԸ-ի միջև 20.09.2018թ. կնքված NՀԲՄԱՊՁԲ-7/9-1 գնման պայմանագիրը.

«ՀՀ ՊՆ ՆՏԱԴ-ՀԲՄԱՊՁԲ-7/9» ծածկագրով գնման ընթացակարգի արդյունքում ՀՀ պաշտպանության նախարարության և «ԲԻԶՆԵՍ ԹՐԵՆԴ» ՍՊԸ-ի միջև 20.09.2018թ. կնքվել է NՀԲՄԱՊՁԲ-7/9-1 գնման պայմանագիրը (այսուհետ՝ նաև Պայմանագիր):

Պայմանագրի՝

- 1.1 կետի համաձայն՝ Վաճառողը պարտավորվում է նույն պայմանագրով (այսուհետ՝ պայմանագիր) սահմանված կարգով, ծավալներով, ժամկետներում և հասցեով Գնորդին մատակարարել պայմանագրի N 1 հավելվածով՝ Տեխնիկական բնութագիր-գնման-ժամանակացուցով նախատեսված ապրանքը (այսուհետ՝ ապրանք), իսկ Գնորդը պարտավորվում է ընդունել ապրանքը և վճարել դրա համար:

- 2.1.1 կետի համաձայն՝ Գնորդն իրավունք ունի՝ ապրանքը պայմանագրով սահմանված ժամկետում Վաճառողի կողմից չմատակարարելու դեպքում հրաժարվել ապրանքից, եթե մատակարարման ժամկետները խախտվել են 10 օրից ավելի՝ ապրանքագրով սահմանված ժամկետից:

- 2.1.7 կետի համաձայն՝ Գնորդն իրավունք ունի միակողմանի լուծել պայմանագիրը (լրիվ կամ մասնակի), եթե Վաճառողն էականորեն խախտել է պայմանագիրը.

- 2.1.7.1 կետի համաձայն՝ Վաճառողի կողմից պայմանագիրը խախտելն էական է համարվում, եթե՝

- ա) մատակարարվել է անպատշաճ որակի ապրանք, որը չի կարող փոխարինվել Գնորդի համար ընդունելի ժամկետում.

- բ) ապրանքի մատակարարման ժամկետները խախտվել են 10 օրից ավելի՝ ապրանքագրով սահմանված ժամկետից:

- 2.4.1 կետի համաձայն՝ Վաճառողը պարտավոր է Գնորդին հանձնել ապրանքը՝ պայմանագրով նախատեսված կարգով, ծավալներով, ժամկետներում և հասցեով:

- 2.4.2 կետի համաձայն՝ Վաճառողը պարտավոր է ապահովել ապրանքի մատակարարումը պայմանագրի 2.1.2 կետի բ) ենթակետին և (կամ) 2.1.5 կետին համապատասխան՝ Գնորդի կողմից սահմանված ժամկետներում:

• 3.1 կետի համաձայն՝ պայմանագրի ընդհանուր գինը կազմում է 73,482,200 ՀՀ դրամ (ներառյալ ԱԱՀ):

• 5.1 կետի համաձայն՝ Մատակարարված ապրանքն ընդունվում է Գնորդի և Վաճառողի միջև հանձնման-ընդունման արձանագրության ստորագրմամբ: Ապրանքը Գնորդին հանձնելու փաստը ֆիքսվում է Գնորդի և Վաճառողի միջև երկկողմ հաստատված փաստաթղթով՝ նշելով փաստաթղթի կազմման ամսաթիվը:

Մինչև պայմանագրով ապրանքի մատակարարման համար նախատեսված օրը ներառյալ Վաճառողը Գնորդին է տրամադրում իր կողմից ստորագրված՝ ապրանքը Գնորդին հանձնելու փաստը ֆիքսող փաստաթուղթը (հավելված N 3.1), իսկ էլեկտրոնային գնումների armeps համակարգի միջոցով՝ նաև հանձնման-ընդունման արձանագրությունը (հավելված N 3):

• 8.9 կետի համաձայն՝ Վաճառողի կողմից ստանձնած պարտավորությունները չկատարելու կամ ոչ պատշաճ կատարելու հիմքով պայմանագիրն ամբողջությամբ կամ մասնակի միակողմանի լուծելու մասին ծանուցումը Գնորդը հրապարակում է www.procurement.am հասցեով գործող ինտերնետային կայքի «Պայմանագրերը միակողմանի լուծելու մասին ծանուցումներ» բաժնում՝ նշելով հրապարակման ամսաթիվը: Վաճառողը, պայմանագիրը միակողմանի լուծելու վերաբերյալ, համարվում է պատշաճ ծանուցված՝ ծանուցումը, նույն կետով սահմանված հրապարակվելուն հաջորդող օրվանից:

Պայմանագրի N 1 հավելվածով նախատեսված Տեխնիկական բնութագիր-գնման ժամանակացույցի համաձայն՝ Ընկերությունը պարտավորվել է ապահովել հետևյալ մատակարարումները.

Կարտոֆիլ, Երևանի տարածաշրջանային զորամասեր, 188,698 կգ, 15,744,000 ՀՀ դրամի, հոկտեմբեր ամսին,

Կարտոֆիլ, Երևանի տարածաշրջանային զորամասեր, 188,698 կգ, 16,068,000 ՀՀ դրամի, նոյեմբեր ամսին,

Կարտոֆիլ, Արմավիրի տարածաշրջանային զորամասեր, 139,023 կգ, 11,664,000 ՀՀ դրամի, հոկտեմբեր ամսին,

Կարտոֆիլ, Արմավիրի տարածաշրջանային զորամասեր, 139,023 կգ, 11,976,000 ՀՀ դրամի, նոյեմբեր ամսին,

Կարտոֆիլ, Գեղարքունիքի տարածաշրջանային զորամասեր, 168,291 կգ, 13,404,000 ՀՀ դրամի, հոկտեմբեր ամսին,

Կարտոֆիլ, Կոտայքի տարածաշրջանային զորամասեր, 53,542 կգ, 4,626,000 ՀՀ դրամի, նոյեմբեր ամսին:

Նույն Տեխնիկական բնութագիր-գնման ժամանակացույցով ապրանքի մատակարարման վերջնաժամկետ է սահմանվել՝ Պայմանագրի կնքման պահից մինչև 15.12.2018թ.՝ Պատվիրատուի գնման հայտի հիման վրա:

19.11.2018թ. թիվ ԴՎԱ/7541 գրությամբ Պատվիրատուի կողմից Ընկերությանն ուղարկվել է ծանուցում, որում նշվել է, որ ՀՀ պաշտպանության նախարարության և «ԲԻԶՆԵՍ ԹՐԵՆԴ» ՍՊԸ-ի միջև 20.09.2018թ. կնքված է NՀԲՄԱՊՁԲ-7/9-1 գնման պայմանագրի շրջանակներում Ընկերությունը 2018թ. հոկտեմբեր ամսին Երևանի տարածաշրջանային զորամասեր պետք է մատակարարեր 188,697 կգ կարտոֆիլ, Արմավիրի տարածաշրջանային զորամասեր պետք է մատակարարեր 139,023 կգ կարտոֆիլ, Գեղարքունիքի տարածաշրջանային զորամասեր, 168,291 կգ կարտոֆիլ, սակայն նոյեմբեր 11-ի դրությամբ մատակարարվել է համապատասխանաբար 77,046, 31,340 և 129,767 կգ կարտոֆիլ:

Պատվիրատուն հայտնել է նաև, որ հիմք ընդունելով պայմանագրի 2.1.7.1 կետի «բ» ենթակետի պահանջները՝ ՀՀ պաշտպանության նախարարությունը 2018թ. նոյեմբերի 19-ին միակողմանի լուծել է ՀԲՄԱՊՁԲ-7/9-1 պայմանագիրը, հոկտեմբեր ամսվա ընթացքում մատակարարման ենթակա, սակայն չմատակարարված 111,651 կգ, 107,683 կգ և 38,524 կգ կարտոֆիլի խմբաքանակի մասով:

Պայմանագրի միակողմանի լուծման մասին ծանուցումը 19.11.2018թ. Պատվիրատուն հրապարակել է նաև www.procurement.am հասցեով գործող ինտերնետային կայքի «Պայմանագրերը միակողմանի լուծելու մասին ծանուցումներ» բաժնում՝ նշելով հրապարակման ամսաթիվը:

ՀՀ քաղաքացիական օրենսգրքի (այսուհետ՝ Օրենսգիրք) 408-րդ հոդվածի համաձայն՝ պարտավորության խախտում է համարվում այն չկատարելը կամ անպատշաճ (կետանցով, ապրանքների, աշխատանքների և ծառայությունների թերություններով կամ պարտավորության բովանդակությամբ որոշվող այլ պայմանների խախտմամբ) կատարելը:

Օրենսգրքի 466-րդ հոդվածի 3-րդ մասի համաձայն՝ պայմանագիրը լրիվ կամ մասնակի կատարելուց միակողմանի հրաժարվելու դեպքում, երբ պայմանագրից հրաժարվելը թույլատրվում է օրենքով կամ կողմերի համաձայնությամբ, պայմանագիրը համապատասխանաբար համարվում է լուծված կամ փոփոխված:

«Գնումների մասին» ՀՀ օրենքի (այսուհետ՝ նաև Օրենք) 6-րդ հոդվածի՝

- 1-ին մասի 6-րդ կետի «ա» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը.

- 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող անձի մոտ՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը նույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին նույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Այսպիսով, Բողոքներ քննող անձն արձանագրում է, որ «ԲԻԶՆԵՍ ԹՐԵՆԴ» ՍՊԸ-ի և ՀՀ պաշտպանության նախարարության միջև 20.09.2018թ. կնքված NՀԲՄԱՊՁԲ-7/9-1 գնման պայմանագրով Ընկերությունը պարտավորվել է 2018թ. հոկտեմբեր ամսին նախարարությանը մատակարարել 496,011 կգ կարտոֆիլ, որից մատակարարել է ընդամենը 238,153 կգ կարտոֆիլ:

Բողոքներ քննող անձը գտնում է, որ «ԲԻԶՆԵՍ ԹՐԵՆԴ» ՍՊԸ-ն 20.09.2018թ. կնքված NՀԲՄԱՊՁԲ-7/9-1 պայմանագրով նախատեսված ապրանքը Պայմանագրով նախատեսված ծավալով և ժամկետներում չմատակարարելով՝ խախտել է նույն պայմանագրով ստանձնած պարտավորությունը, ինչը հանգեցրել է ՀՀ պաշտպանության նախարարության կողմից Պայմանագրի միակողմանի մասնակի լուծմանը:

Հաշվի առնելով վերոգրյալը՝ Բողոքներ քննող անձը գտնում է, որ առկա է «ԲԻԶՆԵՍ ԹՐԵՆԴ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու՝ Օրենքի 6-րդ հոդվածի 1-ին մասի 6-րդ կետի «ա» ենթակետով սահմանված հիմքը:

Ելնելով վերոգրյալից և ղեկավարվելով «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետով, 2-րդ մասով, 50-րդ հոդվածի 7-րդ մասի 2-րդ կետով՝ ՀՀ գնումների հետ կապված բողոքներ քննող անձը

Ո Ր Ո Շ Ե Ց

1. ՀՀ ֆինանսների նախարարության կողմից Հայաստանի Հանրապետության ֆինանսների նախարարության կողմից 29.11.2018թ. թիվ 27/26-3/21864-18 գրությամբ «ԲԻԶՆԵՍ ԹՐԵՆԴ» ՍՊԸ-ին (ՀՎՀՀ 01263483) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը բավարարել:

2. «ԲԻԶՆԵՍ ԹՐԵՆԴ» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ երկու տարի ժամկետով:

ՀՀ գնումների հետ կապված բողոքներ քննող անձի որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրվանից:

**ՀՀ գնումների հետ կապված
բողոքներ քննող անձ՝**



ԷՄԻԼ ՍԱՐԳՍՅԱՆ